

皇
明
輔
世
編

焦太史編輯國朝獻徵錄卷之八目錄

侯二 除封 追封

吉安侯陸仲亨

長興侯耿炳文

鞏昌侯郭子興

江陰侯吳良

靖海侯吳禎

德慶侯廖永忠

南安侯俞通源

營陽侯楊璟

永嘉侯朱亮祖

豫章侯胡美

東平侯韓政

汝南侯梅思祖

安陸侯吳復

景川侯曹震

東勝侯汪興祖

太平侯張軌

追贈侯

永義侯桑世傑

東海侯陳文

東丘郡侯花雲

高陽郡侯韓成

高陽郡侯許瑗

仁和張蔚然

全校

吳興茅元儀

錢塘徐象樞
刊行

焦太史編輯國朝獻徵錄卷之八目錄終

焦太史編輯國朝獻徵錄卷之八

侯二 除封 追封

吉安侯陸仲亨

陸仲亨濠人少負武畧壬辰從征滁和姑熟平建康
攻京口下常宣江陰婺越三衢常熟高郵皆有功從
上親征取南昌下合肥拔安豐殲友諒宣力先登加
帥職又從大將軍取贛州以驍騎衛指揮使改贛州
衛鎮戍節制南安雄韶諸府調兵克梅州會昌湘鄉
悉剗諸山寨自將取英德清遠晉江下廣州遂爲美
東衛指揮使江西行省平章政事移鎮襄陽洪武三

年封吉安侯食祿千五百石與世券明年出守雁門
十三年胡惟庸事註誤惟庸誅法官請併罪仲亨

上曰朕初起兵時仲亨年十七喪父母兄弟避亂持
一升麥藏草間朕見之呼來從朕長育成就累功封
侯此吾初起時股肱心腹吾不忍罪其勿問十四年
鎮成都烏蠻再叛仲亨佐傳將軍討之有功二十三
年坐法論死子賢尚五皇女汝寧公主授駙馬都尉
或曰仲亨與唐勝宗先坐擅調發無功論罪禁繫久
之得赦後坐黨死 上曰朕初先知仲亨反每見其
居貴位無雍和之色時默默有憂容異態今竟爲家

奴所發

獻徵錄

卷之八

長興侯耿炳文

耿炳文濠人父君用取滁和積的爲管軍總管克采石取金陵丙申與士誠戰賈勇先登死炳文代領其軍明年取廣德長興擒士誠守將降其兵會豈元帥府長興以炳文爲總兵都元帥辛丑敗士誠將李伯昇追斬五十餘級拜指揮使吳元年破蘇州陞大都督府僉事洪武初授鎮國上將軍兼右率府副使二年鎮守陝西三年授秦王府左相兼陝西行省右丞封長興侯食祿千五百石與世券十四年破虜北黃河復還陝西二十四年賜鎚鈔造第鳳陽甚先塋贈

君用爲侯二十五年兩當妖人作亂總兵討平之三
十年克征西將軍勦平蜀盜三十一年鎮守遼東建
文元年靖難兵起炳文爲征虜大將軍率衆二十萬
北進至真定都督徐凱兵十萬駐河間都督潘忠楊
松營莫州先鋒至雄縣 文皇出炳文不虞破其城
忠松引衆來援伏兵起忠等皆被執因得炳文盧實
遂長驅至真定張玉朱能譚淵來戰炳文大敗奔還
澤沱河東炳文衆尚數萬復戰衆潰皆降副將駙馬
李堅都督竇忠顧成指揮劉 俱被執炳文固守真
定靖難兵攻城二日不能下而去炳文老將善戰至

是敗建文君始有憂色召還遣李景隆代炳文竟至
亡永樂二年刑部尚書鄭賜左都御史陳瑛劾炳文
衣服器皿僭飾龍鳳玉帶僭丹鞋上曰炳文先朝
老臣亦爲此其速改洪熙初盡以長興侯田舍賜雷
守郭鑑云子璿駙馬都尉獻後軍都督僉事瑄散騎
舍人擢尚寶卿皆獲罪死

鞏昌侯贈陝國公謚宣武郭子興神道碑

劉三吾

臣聞天與聖代大有爲之君必篤生瓌璋英勇之將
與之會遇以成其大業雖人也實天也當元季王政
不綱在所裂裳爲旗荷挺爲兵草野自雄罔所適主
時則今上皇帝龍興鳳陽天人合應有若中山開平
兩公傑出其間是固功無與儷矣其知所趨向先後
䟽附厥有成蹟若鞏昌侯臣郭子興者亦豈偶然哉
子興世鳳陽人拳勇有膂力善騎射自癸巳歲起兵
首隸元師郭某麾下卽知所適主明年得滁州又明

年得和州亦旣從龍濟江若采石若太平若溧陽溧水所向崩角義勇之聲日以暴矣丙申三月隨大軍進拔臺城先登授管軍總管繼陞統軍元帥攻圍常州身犯矢石晝夜不解衣甲爲生蟣蝨九閱月城始下祓賞優渥載調克宣州江陰宜興婺州安慶衢州勢劇破竹壬寅分兵之江西南昌得其全城癸卯八月進克鄱陽彭蠡之戰海艘駢進戒嚴所部人百其勇陳友諒計感中流矢死人知天命有歸矣甲辰春侍上親征湖廣武昌洒血馳戰多所斬獲因屢功擢鷹揚衛指揮使蒞在上心俾從中山王拔廬州拔安

豐率先陷陣大敗姑蘇張士誠爲之奪氣其平襄陽
下衡州定澧州辰州轉而縣高郵踣淮安截拔浙西
湖州坐困姑蘇往往累瘡力戰中山王以公之勇功
聞陞鎮國上將軍大都督府僉都督吳二年正月改
洪武元年今上卽位有事關陝命領其軍進討中原
陞守潼關三年一迹不敢南移戊鞏昌招募適殘嚴
戢部曲西戎羗夷兩境帖然進封鞏昌侯方倚之永
鎮西陲而溘先朝露薨於家矣上爲之震悼輟朝三
日時贈有加追封陝國公謚宣武以洪武十七年冬
十有二月日葬聚寶山之原

子四景儀振宗官僧弟英封武定侯女弟入宮進位
寧妃興有弟德成事 上爲驍騎舍人性明爽見幾
避禍以酒自放 上一日召授某府都督懇辭不受
上變色曰朕念爾親且舊兄弟皆登列侯而爾獨未
顯故畀爾職何辭爲德成免冠泣拜曰臣性狂愚懶
慢耽酒嗜卧不識事情緩急倘位高祿重必任職司
事苟不理 上殺我也人情不過多得錢飲美酒隨
意自適足了一生願卒賜 上大喜曰善人舉能若
此吾刑可措矣立書勅賜黃封百畧金絲稱是寵待
益厚德成嘗侍宴後苑醉匍匐免冠謝髮禿落且盡

上笑曰醉風漢毛髮如此非過酒耶德成仰首曰臣
猶厭其多欲盡剃始快意 上默然既醒大懼誤觸
忌諱遂盡剃髮披僧衣狂呼唱佛不已 上笑謂寧
妃曰前謂汝兄戲言乃實爲之非風而何德成嘗見
其兄弟征鎮四方逾年不得歸輒笑其以虛名受辛
苦曾如我飲中樂耶已而黨事起死者相屬德成益
狂蕩不檢以壽終

江陰侯贈江國公謚襄烈吳良神道碑

吳伯宗

洪武十四年十一月二十六日開國輔運推誠宣力
武臣榮祿大夫柱國同知大都督府事江陰侯吳公
薨於青州十二月訃聞皇上爲之憫悼輟朝三日詔
所司定贈謚加爵特進光祿大夫上柱國中軍都督
追封江國公謚曰襄烈遣使者迎柩以歸洪武十五
年二月丙子賜葬鍾山之陰上念其功不已命詞臣
撰文勒諸豐碑以垂不朽伯宗職居翰林屬當執筆
謹叙而銘之公諱良姓吳氏鳳陽定遠人初名國興

後賜今名氣岸雄偉性質剛直與弟禎俱以勇力稱
元末羣雄並起海內鼎沸皇上以聰明神武仗大義
奮起布衣公兄弟委身相從服勤左右上深器焉甲
午秋從上取滁州乙未春從克河陽常爲先驅戰皆
有功六月從渡大江與元兵戰於采石拔其營乘勝
克姑孰尋下溧水溧陽丙申從定建康戰功爲多又
從今大將軍太傅魏國公徐公達克鎮江下常州屢
著功勲歷升軍職丁酉下江陰命公以指揮使領兵
鎮守時僞吳張士誠據姑蘇跨有淮東浙右地大物
衆兵食富強實江南一勁敵而江陰正當東南要衝

喉襟之地士誠又多變詐動以金帛啗誘將士公行
上諭之曰彼以其詐我以吾誠爾爲邊將鎮守封疆
約束士卒母外交母納逋逃母逐小利母與爭鋒惟
保境安民而已公奉命惟謹繕城池遠斥堠利器械
嚴部伍士卒無敢逃亡無敢出境生事者敵亦畏公
之威不敢侵犯數年上親將兵下江西克湖廣僞漢
陳友諒大軍屢出而無東顧之憂皆以公之扞蔽也
丁未大軍克姑蘇士誠面縛上以姑蘇承士誠割據
之餘力戰乃服必得剛毅有智畧者鎮其地遂以命
公公至奉宣皇上盛德紀律嚴明號令整肅軍民輯

睦威得奠安洪武三年天下大定論功行賞以公有
守江陰之功封爵爲江陰侯食祿二千五百石賜以
鐵券子孫世襲恩至渥也廣西右江諸州僻處炎徼
去中國遠數千里前國號爲要荒乍臣乍叛唐宋以
來羈縻而已元都北方相去益遠姑息尤甚夷俗粗
於仇殺數侵盜邊境五年春命公將兵討之公率兵
入政履崇山踐歷險阻剪難荆棘衝冒瘴霧勤勞特
甚數月盡平其地俘獲不可勝計自是溪洞夷獠畏
威懷德革心向化輸租賦奉法今同內地焉先是上
稽古制建親王爲盤石藩屏齊王受封青州命公營

建王府宮殿社稷公經營區畫部署軍卒並手偕作
功成而民不知勞公畱青州二載得疾而薨享年五
十有八公自起身行伍至爲將帥受封爵始終一致
有功無過故其薨也上深惜之恩禮有加焉

靖海侯謚襄毅吳禎神道碑

劉崧

洪武十一年戊午前征南副將軍靖海侯吳禎奉詔
出定遼是秋以疾聞上遣醫馳驛視之弗能愈遂與
疾還京車駕幸其第問勞有加明年己未五月疾革
以其月二十有六日薨訃聞上爲之震悼輟朝二日
詔贈特進光祿大夫柱國追封海國公謚襄毅仍賜
窆鍾山之陰俾官給其事葬之日車駕臨奠加贈賻
焉又明年庚申上追念其勞爰勅儒臣禮部侍郎臣
崧撰文刻諸神道之碑以昭不朽臣崧奉詔不敢辭
乃考公牘紀載第而書之謹按公初名國寶後賜名

禎字幹臣姓吳氏世爲濠之定遠人自少時已卓犖有膽畧及天下大亂從上起兵里中卽能知天命有在與兄江陰侯良俱隸麾下悉心委事焉自歲甲午乙未西克滁和東渡大江揚威振銳所向無敵由帳前都先鋒爲總管陞建興翼院判轉分院元帥尋爲天興右翼副元帥與良同守江陰每寇至輒擊走之首破僞吳張士誠水寨擒其梟將朱定甲辰授英武衛指揮使丙午寇出馬馱沙上親督戰追至巫子門寇乘潮逆拒首尾相失公縱兵急擊之俘獲無算是秋從大將軍魏國公徐達率馬步舟師由港口取湖

州公勒奇兵出舊館扼之戰大捷事平遂畱戍焉吳
元年丁未九月復從大將軍攻圍蘇州連破胥封二
門士誠就執公奉令撫循秋毫無擾進僉大都督府
事時方谷珍據明州未下上以公爲征南副將軍從
御史大夫信國公湯和往平之公引舟乘潮夜入曹
娥江通道夷墳出其不意直抵車廐會降者言方氏
已潛挈家入海公領兵追於盤嶼與合戰自申至夜
三鼓敗之盡獲其戰船人馬輜重而還未幾谷珍降
有旨由海洋進取福州不數日奄至城下圍其西南
水部三門一鼓克之時僞平章陳友定據延平作亂

明年洪武元年戊申進破延平擒友定閩海平公歸
次昌國會海寇葉陳二姓聚劫蘭秀山公調兵立勦
之三年庚戌朝廷定功行賞進侯食祿一千五百石
賜以鐵券使子孫世襲焉五年壬子詔大發兵東戍
定邊公總舟師數萬由登州轉運以餉之海道險遠
人用艱虞公調度有方兵食克羨折衝風濤如履四
達尋召還七年甲寅海上警聞公復領沿海各衛兵
出捕至琉球大洋獲倭寇人船若干俘上京上益嘉
賴之常往來海道總理軍務至是歸自遼東而疾作
不起矣公生以天曆戊辰六月二十一日薨以薨之

閏月十三日享年五十有二

德慶侯廖永忠傳

廖永忠楚國公永安弟也少豪邁有大志智勇過人
甲午屯巢湖乙未來歸上見其年少謂曰汝亦欲
圖富貴乎以水將屬永安永忠爲副從渡江拔采石
太平蕪湖擒陳兆先破蠻子海牙乘勝定建康克鎮
江宣城討江陰海寇皆有功永安陷敵授永忠樞密
僉院總永安兵攻普勝柵江營追殺賊衆復樅陽友
諒襲太平犯龍江諸將據險張德勝總兵進擊永忠
大呼殺入諸兵從之友諒敗復太平陞同知樞密院
事上率舟伐友諒至安慶敵固守上以陸兵疑

之敵兵動永忠擊其水寨破敵舟破安慶追至小孤
山次湖口未至江州五里友諒知之窮蹙挈妻子棄
城走武昌遂入江州從征南昌南昌降祝宗康泰據
南昌叛復從徐將軍討復其城援安豐敗士誠兵是
時友諒圖南昌 上討友諒永忠以七舟載葦荻置
火藥其中乘風縱火焚戰艦數百艘煙焰漲天湖水
盡赤大敗敵兵友諒移舟迎湖口永忠邀其歸路友
諒中流矢擒其太子善兒次子理奔武昌復稱帝
上還論功賜永忠田 上復征理至武昌永忠等分
兵柵四門又於江中聯舟爲長寨絕其出入 上還

建康畱永忠等守營柵勿與戰 上復往武昌視師
督攻城降理陞湖廣行省左丞攻廬州左君弼敗走
復援安豐取江西未下州郡從徐將軍常將軍取淮
東克海安高郵淮安從拔姑蘇陞中書平章政事湯
將軍旣下溫台慶元方國珍遁入海島永忠爲副帥
率師自海道會湯將軍討降國珍得兵械舟楫萬計
取福州洪武元年兼同知詹事院事畧定閩中執友
定充征南將軍朱亮祖副之率舟師由海道取兩廣
永忠自福州遣人諭何真真以廣循惠降師至廣州
龍潭元將盧左丞降破僞叅政邵宗愚山寨獲宗愚

等斬廣州市捕誅諸叛土豪諸郡相繼降檄諭九真
日南朱崖儋耳三十餘城皆納印請吏遂取廣西至
梧州降元達魯花赤拜住廣西平章者林時元替領
帖木兒張翔以便宜行事入廣西募兵欲迎戰亮祖
勒兵追普顏戰死翔赴水死潯貴等州郡皆降師次
貴州遣亮祖會陽璟收未下州郡兩廣悉平明年還
京上命太子率百官迎勞龍灣入見命太子送還
第一年撫定泉漳三年封德慶侯食祿一千五百石
賜世券是年湯將軍充征西將軍永忠爲副率京衛
荆湘舟師由瞿塘趨重慶伐明昇四年和克歸州駐

師大溪口永忠率所部先進至瞿塘關蜀設鐵鎖飛橫據開口我舟不得進永忠密遣數百人舁小舟踰山度關出上流人持糧糗帶水筒禦饑渴蜀山多草木將士皆衣青蓑衣魚貫出崖石間蜀人不覺度已至率精銳出墨葉渡分兩道夜五鼓攻水陸寨將士皆以鐵裹頭船火器而前黎明蜀人始覺盡銳來拒永忠已破其陸寨矣既而將士舁舟踰山出江者一時俱發上流楊旗鼓噪而下蜀人大駭下流之師亦擁舟前進發火器夾攻大破之斬其將遂焚三橋斷橫江鐵索斬溺死者無算飛天張鐵頭張等皆遁去

永忠入夔明日湯將軍兵始至永忠乃與湯將軍分道並進湯將軍率步騎永忠率舟師會重慶永忠抵重慶次銅鑼峽昇遣使詣永忠軍請降永忠俟湯將軍至受降下令將士不得侵掠撫諭向大亨戴壽等家令特書往成都招諭遣指揮萬德送昇等并降表京師蜀平凱還賜第京師又出征胡捕倭八年卒子權娶湯將軍女爲散騎舍人九年從馮勝練兵西安十一年從御史大夫丁玉征松疊十三年嗣侯十四年從傳將軍征雲南十五年領兵守畢節移守瀘州十六年召還十七年卒從子昇淮安衛指揮僉事陞

同知蘇州衛事

朱敷錄

以朱三六

上

南安侯俞通源傳

俞通源字百川少從父兄立功通海卒卽軍中領其兵攻蘇州擒士誠嗣通海官從大將軍征中原下山東河南北山西諸郡督副將馮宗異等會兵太原取陝西克慶陽率師自臨洮疾趨至涇州合兵圍慶良臣竟援絕糧盡窘戰死西征王保保獲畜產萬計出連雲棧克興元皆先登洪武三年封南安侯食祿千五百石與世券從廖永忠伐蜀又從魏國公出塞征甘肅有功八年徙江南豪十四萬田鳳陽命通源撫輯開水利墾田攻雲南征廣南諸蠻俘戰萬數二十

二年詔還鄉未行卒卒後逾年生黨事以死不究仍
賜葬聚寶山統國公之墓傍弟通淵以父兄故充叅
侍舍人從大將軍征秦隴燕趙功陞督府僉事征哈
刺哈至捕魚兒海獲酋長人畜班師轉餉二十萬石
江西又征都勻龍場諸蠻峒克辰沅寶慶俘獲多

上又念通淵父兄功封越嶲侯食祿二千五百石率
師討建昌叛賊築城越嶲二十六年坐累罷侯以家
人還鄉建文元年召通淵爲豹韜衛指揮使戰歿白
溝河子翊先卒次靖是年嗣官明年卒次端又明年
優給錦衣未幾卒遂無後通源子祖病痿不能嗣孫

宗曾孫信信宣德十年乞嗣信子璿璿子仲仲弘治
五年皆乞嗣不許墓在號國公旁

營陽侯楊璟

楊璟合肥人本儒家子少沉毅讀書不喜章句好武畧來歸授管軍萬戶溧水句容金陵功陞管軍總管鎮江江陰功陞親軍副都指揮使娶諸暨功陞樞密判官從征友諒克九江黃梅廣濟立湖廣行省璟爲叅政移鎮江陵討斬叛寇進攻湖南洞蠻駐師三江口招討功陞平章政事充征南將軍取廣西降土官黃英衍岑伯顏還京爲偏將軍征山西平唐鄧南陽畱鎮未幾招撫明昇昇不從璟還復書與昇曰昔據蜀者最盛若如昭烈孔明佐之訓練士卒財用不足

取之南中然猶朝不謀夕僅能自保足下疆場南不
過播州北不及漢中而欲以一隅之地綿頃刻之命
可謂智乎若謂險阻可恃蚕叢魚鳧之鄉不至足下
矣鄱陽一戰友諒授首旋師東討張氏面縛此非人
力實天命也友諒子竄歸江夏王師致伐勢窮出降
主上有罪封侯恩榮之盛天下所知足下幡然覺
悟自求多福豈不謂賢智哉今爲足下謀者他日或
以郡獻或以城降各自爲身計取富貴當此時老母
弱子將安歸乎禍福利害瞭然可觀逆順之途在足
下審之而已曩不能從湖廣慈利土酋覃屋諸蠻爲

亂璟討之賊遁溪洞還兵洪武三年封營陽侯食祿
千五百石與世券從伐蜀次夔州進攻瞿塘不利赤
甲白鹽之師亦退還歸州蜀旣平上以璟無功不
賞沅辰蠻亂爲副將軍討平之師還佐大將軍鎮北
平召還又赴北平練兵兼領遼東訓練士卒十五年
卒贈芮國公謚武信子通十七年與靖寧侯葉昇捕
象廣西之左江二十年領韃靼官軍往戍雲南多道
亡降許定衛指揮使次達亦官散騎舍人云

永嘉侯朱亮祖傳

朱亮祖六安人元義兵元帥乙未上克寧國擒亮祖喜其勇悍賜金帛俾仍舊官居數月復叛數與我戰敗我兵七千餘人丙申下建康明年克毘陵遂遣徐達等討之進圍亮祖於寧國常遇春被創而還上自往督戰亮祖兵敗縛以見上上曰爾將何如對曰生則盡力死則死耳上壯其言鞭而釋之置麾下自是從軍四征所向克捷以功陞元帥至院判從征友諒克九江下南昌江西諸郡大戰鄱陽湖平武昌陞廣信衛指揮使會胡深討陳友定取浦城

克崇安建陽等處乙巳二月張士誠兵寇諸全新城
亮祖以兵擊之焚其營落數十攻桐廬圍餘杭降僞
平章潘元明陞浙江行省叅知政事副李將軍守杭
吳元年丁未帥馬步舟師討方國珍國珍拒戰敗
夜走黃巖亮祖入其城遂徇下仙居諸縣進兵溫州
國珍子明善戰敗挈妻子遁去克其城分兵徇瑞安
還至黃巖方氏父子來降送建康洪武元年二月
上以浙閩旣平乃命亮祖爲征南副將軍與廖征南
海道取廣東進取廣西師還太子率百官迎勞龍
灣洪武三年封永嘉侯食祿千五百石與世券四年

二月 上以諸將伐蜀久無功復命亮祖爲征虜右
副將軍率兵往助之肅兵至蜀傅友德已攻克階文
永忠克重慶乃分兵徇下州縣之未附者蜀地悉平
還師與何文輝同鎮北平移鎮廣東番禺知縣道同
上言亮祖不法數十事 上念功臣不下吏罷職令
居江寧之安德鄉十三年以病卒 上爲志墳以侯
禮葬之

豫章侯胡美傳

廖道南撰

豫章侯胡美初名廷瑞避御字改今名漢沔人至

正間仕陳友諒爲江西行省丞相守南昌高皇帝

率師征友諒直擣九江兵咸震疊美遣宣使鄭仁傑

詣九江納款上賜書慰諭上至南昌美迎謁

上撫勞之俾仍故官命美同相國徐達等率馬步舟

師水陸並進克海安泰鄒淮泗濤穎從伐張士誠下

湖州進圍蘇州吳元年九月破其城執士誠遂取無

錫州以歸論功召見於戟門賜彩段表裏加榮祿大

夫降勅褒諭十月命爲征南將軍率安吉寧國南昌

表賴滁和無爲等衛軍由江西取福建 上喻美曰

征伐所以奉天命平禍亂安生民故命將出師必在
得人汝以陳氏丞相來歸事吾忠實無過故命汝總
兵取福建取江西左丞何文輝副之湖廣叅政戴德
隨征從汝調發二人皆親近之人勿以此故廢軍政
凡號令征戰一以軍法從事聞汝往年嘗攻閩中必
深知其地里險易今總大軍進征凡攻圍城邑必擇
便可否爲之進退無失機宜克定之全賴於汝十一
月帥師渡杉關畧光澤縣下之十二月師至邵武元
守將李宗茂以城降得將士五千四百餘人至建陽

降其守將曹俊疇指揮沈友仁守之洪武元年正月
上卽帝位功臣進秩詔美以榮祿大夫中書平章
兼同知詹事院事是月壬午率師至建寧環其四門
攻之壬辰克建寧守將達里麻子納款總管翟也先
不花亦率衆請降美乃整軍入城申嚴號令秋毫無
所犯執叅政陳子琦送京師獲將士九千七百九十
餘人馬二百七十匹銀一萬六千三百兩糧九萬八
千六百四十石命指揮費子賢領兵守之二月克興
化遣建陽降將曹俊疇招諭汀州寧化連城等縣元
汀州路守將陳國珍納款泉州郡縣相繼降附時王

師已取福州延平諸路福建悉平統兵守禦五月
上幸汴梁召還扈從凡行在機務悉預區處兵行無
擾二年十二月大賞征南及守禦功賜白金二百五
十兩文幣十七表裏三年七月往河南等處招集故
元王保保所部亡散士卒凡占籍在洪武元年者聽
爲民二年以後者收入兵五年十一月封功臣授開
國輔運推誠宣力武臣榮祿大夫柱國封豫章侯食
祿一千五百石世襲賜誥命鐵券十三年正月改封
爲臨川侯董建潭王府於長沙貳十六年卒

東平侯韓政

韓政睢人元季爲義兵長上定江左來歸授江淮
行省平章政事李濟據濠爲僞吳守上命善長書
招濟不報上曰濠吾鄉濟爲僞吳守是吾有國無
家可乎命政率指揮顧時等以雲梯砲石四面攻濟
濟出降畱時守濠召政攻安豐以兵扼四門攻不下
潛穴城東龍尾壩二十餘丈壞城遂破安豐忻都竹
昌左君弼皆出走追獲忻都昌君弼走汴竹貞來援
又破貞克安豐至潁獲糧艘歸汴東西悉平從平浙
自北伐中原分兵扼黃河斷山東援兵取益都濟寧

濟南東平改山東行省平章政事大將軍取元都檄
政會東昌鎮撫臨清元都定又令政分兵守廣平蠡
尖寨者在林慮西北二十里元右丞相庸等據寨剽
剝旁近給軍食徐將軍收諸山寨蠡尖寨恃險絕未
下政進攻庸降調征陝西還兵守禦河北洪武三年
封東平侯食祿千五百石與世券移鎮山東未幾復
征河北招撫流移出居庸搗應昌取和林深入土剌
進至阿魯渾河大獲而還出巡河南再巡陝西練兵
臨清十一年卒贈鄆國公子英散騎舍人

汝南侯梅思祖傳

朱睦㮮

梅思祖者夏邑人也初爲張士誠中書省左丞守淮安歲丙午大將軍徐達旣下高郵進兵攻淮安思祖封府庫甲兵率衆來歸上嘉之授大都督府副使是年八月從達伐吳取浙西十月攻昇山水寨克之降僞吳將呂珍得兵數萬十一月下湖州進圍蘇州吳元年九月城破士誠被執師還特降褒諭擢浙江行中書省右丞階資善大夫十月從征中原克山東沂州等郡洪武元年取大梁破陝州下潼關七月旋師徇取河北衛輝元守將平章龍二棄城走彰德師

至彰德龍二復出走同知某等詣降以思祖統和陽
衛兵守之復得龍二部將楊義卿船八十餘艘未幾
微赴北平取未下州郡遂征山西二年晉冀悉平復
從征陝西取奉元鳳翔平涼鞏昌四郡八月於邠州
獲故元叅政毛貴等三十人送大將軍斬之十二月
中原平賜思祖白金十斤文幣十五襲三年四月擊
走王保保軍於定西還自秦州破畧陽入汧州取興
元是年論功封汝南侯四年伐蜀五年征甘肅還命
巡視山東陝西遼東諸處城池十四年九月四川水
盡源通塔平散毛諸洞長官作亂命思祖爲征南副

將軍同江夏侯周德興率兵討之未幾諸洞夷悉平
十五年復同傅友德克平雲南置貴州都指揮使司
以思祖署都指揮使 上以雲南初平欲使重臣鎮
之又命思祖署雲南布政使司事思祖善撫輯民夷
安之十月丁丑思祖薨賜葬鍾山之陰子義武德衛
指揮陞遼東都指揮使從子殷自有傳 論曰馬援
有言匪獨君擇臣臣亦擇君當元季四海鼎沸豪傑
並起汝南乃能鑒機審勢率衆來歸非凡夫淺人所
可窺測也卒從諸將建封侯之業安反側之夷芳番
竹帛慶延支庶智矣哉智矣哉

安陸侯吳復傳

吳復字伯起合肥人甲午率衆歸濠領前驅從克泗
滁采石太平歷陞萬戶定建康投總兵攻鎮江斬元
定定平章守常州吳兵奄至死戰躍馬持矛追奔數
里援宜興戰高橋仍守常州從征陳理圍廬州先登
卜漢沔授鎮武衛指揮同知守沔陽克汝州黃口陞
安陸指揮使調征陝西土蕃克河州從潁州侯平蜀
從衛國公平九溪蠻進督府僉事從西平侯再征土
蕃洪武十二年封安陸侯世指揮使從潁州侯鎮雲
南克普定克總兵官勦殺蠻寇北取廣西轉餉盤江

卒追封黔國公謚威毅與子孫世侯券食祿二千五百石復衝冒矢石體無完膚平居恂恂至臨陣奮發無堅不潰在普定買妾楊氏年十七復殮慟哭已沐浴更衣自經死封貞烈淑人十八年子傑以指揮嗣屢出山陝河南北平練兵從征二十八年有罪與吳高皆從楊文征龍州建功自贖建文中率師援真定戰白溝河失律謫南寧衛指揮使永樂元年子瑛乞嗣正統間再三乞皆不許弘治六年璟孫鐸援詔乞嗣亦不許

景川侯曹震

曹震濠人立功開國時洪武十二年以征西功封景川侯食祿二千石世指揮使十三年與營陽永城二侯屯田北平從傅將軍征雲南取臨安諸路十八年請討迤南朵耳上曰以利而動非兵之善慎宜鎮靜遣置四川傳道召還鄉未及行又命覈征士四川代藍玉還京上便宜五事報可二十四年往四川鑿石通河爲灘百九十三爲橋五十四永寧至大理建昌至西番皆爲驛舖詢議任勞雨雪不避坐藍黨論死

東勝侯汪興祖傳

汪興祖，樂人。初爲張德勝養子。德勝戰歿，子宣幼，興祖嗣職。從張姓征友諒，與俞通海、趙德勝、揭傒水寨抵江州，克其城，進拔蘄州，從取南昌。士誠圍劉福通，安豐興祖從上援，敗其衆，還攻廬州。鄱陽之戰，興祖等六舟深入搏戰，又邀擊禁江口。友諒敗死，擢湖廣行省叅政。陞督府副使，克淮東，下湖州。平吳陞同知。督府從大將軍北征，取山東州縣。孔子五十六世孫衍聖公孔希學聞大軍至，率曲阜希舉、鄒主簿孟思諒謁軍門，興祖體之，克東州縣皆降，兼領右軍府。

事克汴梁還濟寧取元都徇永平下山西收大同時
宣已長嗣父職興祖乃復姓克武朔爲晉王府傅兼
山西行督府僉事洪武四年封東勝侯人有言其過
者上弗問亦弗與詰券令自效圖實封從傅將軍
克階又蜀平章丁世真據險距我興祖躍馬直前中
飛石先詔都督興祖沒王事授原封侯爵世券食祿
千五百石興祖子幼以所賜田五頃令興宣同居後
疾卒

太平侯贈裕國公謚勇襄張軌墳誌

南陽李賢撰

公諱軌姓張氏河南開封之祥符人父榮國公玉是爲河間忠武王母王氏河間王夫人長兄太師英國公輔是爲定興忠烈王文安伯輓其仲兄也永樂中公以勛戚侍太宗皇帝授錦衣衛指揮僉事洪熙元年仁宗皇帝嗣位恩賚有加特陞指揮同知宣德改元漢庶人作亂宣宗皇帝親率六師討平之公扈從有功賞予甚厚仍給世襲誥命正統甲子今上以北虜未靖命成國公朱勇往征之公爲前行首敗虜

於北城復追至種帽山虜悉衆來戰公奮擊之虜
而潰斬馘甚衆凱還以功陞指揮使又用薦陞都指
揮僉事典禁兵未幾復署僉前軍都督府事尋卽真
時麓川賊子思幾發復爲亂上命將往討以公副
之旣至分道並進一鼓就擒師還至荊州復命公移
師貴州以討叛苗會景泰改元遣使詔還以麓川功
陞右都督總京營兵天順元年上居南宮公奉
上聖皇太后勅符與太監曹吉祥忠國公石亨暨兄
輓等協力擁戴迎上復位論功行賞進封公奉天
翊衛推誠宣力武臣特進光祿大夫柱國太平侯食

祿二千石賜以誥券寵賚之厚莫與爲比仍官子璫
爲錦衣衛指揮同知是年冬公上疏曰臣犬馬之年
六十有五筋力日衰乞解兵柄以全晚節上方倚公
不允二年春公得疾上卽命御醫往療屢遣中貴
人視公賚與頻繁已而疾愈劇公復力疾上疏曰臣
年命乖蹇藥不奏功旦夕待盡惟聖明爲宗社生民
計選賢任能以圖至治臣卽瞑目地下矣他一無所
請上覽之惻然復命公勉進藥餌副眷念命下而公
已卒是年三月十六日也距生洪武癸酉九月二十
九日享壽六十有六計聞上深哀悼素服罷朝飲

日卽遣官諭祭喪葬賻贈之儀悉從優等追封祔曰
公謚勇襄

永義侯桑世傑

桑世傑無爲人元亂與廖俞蔡諸公結水寨巢湖乙未納款趙普勝蓄異志公洩其謀上得歸和陽集商舟載勇士至黃墩攻敗普勝及蠻子海牙上趨入和陽諸軍大集卽攻破采石鱗魚洲鐵長官水砦取太平擒也先蠻子海牙遁擒兆先入金陵拔鎮江陞秦淮翼元帥下金壇卅陽從圍常州攻寧國常州平陞判行樞密院事取馬馱沙克大浦口江陰下太湖收宜興尋與諸將攻江陰石牌海寇樂瑞公奮戈躍馬陷陣死諸將大怒奮擊盡獲海舟擒瑞上念

公贈永義侯侑享

太廟國初忠節廬有公及廖楚

公俞號公蔡梁公四人洪武六年詔定功臣謚號禮

部言光武封寇恂爲承義侯景升奉義侯世傑侯名

永義不必重謚

上從之子敬以父故陞督府僉事

立功洪武二十三年封徽先伯誥曰朕當羣雄鼎沸

之秋提虎旅東渡大江爾父世傑率師來歸由是披

堅執銳數著勤勞旣而歿於戰陣已贈侯爵朕不能

忘遂陞爾中軍都督府僉事俾蒙先業從征伐克底

成功茲又擒除奸兇豈不彰美前人之績朕嘉爾忠

特封爲推忠協謀武臣龍虎將軍上護軍徽先伯食

祿一千七百石子孫世嗣二十四年練兵邊塞召還
明年又出南陽信陽練兵繕浚城隍經畧屯田明年
閱戍籍軍平陽已而屢出山陝北平練兵老卒

東海侯陳文

陳文合肥人早喪父奉母至孝勤於稼穡家遂殷富
元季挈家從上屢立戰功累官至都督僉事洪武
十七年十月壬申以疾卒年六十追贈東海侯謚孝
勇本朝惟廟號稱孝羣臣謚孝惟文一人

諡

惟文
一人

東丘郡侯花雲墓碑

宋 濂

皇上渡江之六年庚子夏閏五月癸酉僞漢主陳友諒以舟師入寇圍太平行樞密院判花公率麾下三千餘人結陣迎戰三日賊不得入乙亥城中乏食公士馬憊城陷賊縛公怒奮身大呼縛盡解起奔守者刀殺五六人罵曰虜非吾主敵也曷不起降賊怒碎公首縛於舟檣衆射之公忿激罵賊不少變至灰聲猶壯已而賊犯龍江上命諸將力戰賊敗遁去後五年甲辰上卽吳王位追封公東丘郡侯又十六年其子僉水軍左衛指揮司事煒泣曰先公歿

今二十年無文銘於神道竊恐忠烈不白於後世
請惟公勲業始卒宜載國史余嘗待罪太史氏不敢
以老辭公諱雲姓花氏世爲懷遠人自考以上姓名
皆亡莫知遷徙世次然皆不顯公少孤隨母嫁張氏
貌偉而黑驍勇絕人儕輩畏服之歲癸巳杖劍謁

上於臨濠 上奇其材力俾將兵畧地所至輒克破
懷遠城口虜其帥以歸進攻全椒拔之羣寇據繆家
寨公俟夜襲之寇散走上將取滁州單騎前行遇賊
數千人於道拔劍躍馬衝其陣而過賊驚曰此黑將
軍勇甚不可與爭鋒兵旣至遂克滁州甲午從 上

取和州得卒三百以功授管勾明年乙未寧所部先
渡江上克太平以公忠勇可信任命宿衛左右丙申
上破集慶公得兵千人陞總管徇鎮江丹陽丹徒
金壇諸縣皆下之過馬馱沙劇盜數百遮道索戰公
且行且鬪三日夜皆禽殺之授前部先鋒攻常州拔
其城駐守牛唐營夏六月立行樞密院於太平遂拜
公院判偕安遠大將軍丁酉春正月克常熟州獲卒
萬餘命公將之秋七月以兵三千之寧國陷山澤中
八日羣盜相結梗道公操矛鼓譟出入營壘間斬首
千百計而身不中一矢還命守太平後四年遂卒卒

時年三十有九夫人邵氏公與僞漢戰時一子方三歲夫人以牲酒祭家廟會家人泣曰今城且破吾夫忠義人必以身死之吾夫死吾必不獨生然不可使花氏無後嬰兒在若等善撫育之聞公就禽夫人赴水死年甫三十有五侍兒孫氏瘞夫人屍遂抱兒以行僞漢軍虜之至九江軍中惡養小兒孫氏以兒授漁家屬之曰此兒良宜善視之是年冬王師伐僞漢漢敗孫氏至漁家視兒在矚漁人出竊負以走夜宿陶穴中天曙脫簪髻舟渡江遇偵軍奪舟棄江中孫氏抱兒遇斷木浮至附之人葦洲採蓮實哺兒七

日不苑夜半聞人語聲呼之逢老父號雷老告之故
與俱行明年辛丑春二月達上所孫氏泣抱兒拜

上上亦泣寘兒於膝曰此將種也賜雷老衣遣之
復其徃已而令人追之忽不見兒八歲侍皇太子就
學年十三授虎賁右衛副千戶後七年拜今官郎煇
也煇於洪武丁巳偕孫氏至太平奉夫人骸骨歸乃
束草像公以二月巳未合葬上元縣南五十里之水
橋嗚呼觀公之死賊與妻妾之報公可以知公之爲
人矣天不殄其後豈不宜哉銘曰雲雷造屯區宇分
篤生其人鎮乾坤騎龍鞭霆下天門前翼後衛蒼

若雲誰其最雄花將軍力驅智駕敵萬人蹂躪羣盜
猶鷹鷹大刀長戟屬素韃右麾右刺流電奔緋衣緇
弁貌虎屯駐馬飲江江水渾吳楚之域殺氣昏手挽
天河洗妖氛軍聲隆隆然若雷霆遭者膽落兩足踣元
戎開府大江濱腰佩兵符威令尊控制上游爲國藩
侮漢恃力不圖存建旗揚帆事鉦鼓艤艤蔽江躡鉤
援捷牛享士士氣伸馳馬督戰寧顧身賊焰熾若烈
火焚大戰三日勢愈殷單騎赴之齒嚙齧怒髮上指
目吐煙因汝賊兇頑犬與豚願醢汝肉一口吞賊慙
耳塞不忍聞至不死屈酬國恩飄然乘雲叩帝閭請

爲厲鬼扼賊亢賊當殛死洗厥元天子下詔褒忠勲
東丘立侯賁九原孤兒保育寵便蕃不墜宗祀天所
敦生爲烈士死明神神靈在天光焯焯嗟爾來觀萬
子孫繼忠思孝慎勿諼弗信請考太史文

高陽郡侯韓成

韓成虹縣人有勇略壬辰從太祖舉義率先戎陣
攻徐克泗破諸山寨甲午克滁州授鎮撫守禦乙未
渡江拔采石太平攻蕪湖丙申克金陵鎮江等處陞
元帥守金壇從攻常州敗援兵解牛塘圍遂取揚州
從下婺州復池陽戰龍江擒江州下南冒皆有功陞
帳前總制親兵左副指揮使侍帷幄從拔安豐攻廬
州僞漢陳友諒舉所有兵號六十萬圍南昌急成從
上親征大戰於鄱陽湖自戊子至庚寅三勝之後酣
戰被圍一時羣將計無所出上方設奇成進曰臣

聞古之人有殺身以成仁者臣不敢辭遂賜成龍袍冠冕與上服同對賊衆投水中賊遂退友諒敗死上還建康謂中書省臣曰自古兵爭忠臣烈士以身殉國朕與陳友諒戰於鄱陽韓成效忠死敵朕念之不忘爾中書其議所以崇報之禮贈高陽郡侯建忠臣祠康郎山命有司歲時祭之

高陽郡侯許瑗

許瑗饒之樂平人讀書聰明強記至正中兩以易經
舉於鄉皆第一及會試不第放浪吳越間每醉輒大
言自負人未有知之者歲戊戌上駐兵婺州瑗以
儒士進謁因言於上曰方今元祚垂盡四方鼎沸
豪傑才勇之士勢不能獨安夫有雄畧者乃可馭雄
材有奇識者然後能用奇士欲掃除僭亂平定天下
非攬收英雄難以成功上曰今四方紛擾民困塗
炭予用英雄有如饑渴也授博士留帷幄中叅謀議
以太平股肱郡命爲知府瑗至厲士卒修城池撫黎

庶庚子僞漢陳友諒率舟師攻太平守將樞密院判
花雲與瑗等以兵三千拒戰友諒攻城三日不下引
巨舟泊城西南士卒緣舟尾攀堞而登城遂陷瑗被
執罵不屈死之 上嘉其忠追贈高陽郡侯